

Biografia 4 kondekoradonan Krus di Mérito 2020

Sr. Benedicto Marte, nasé 21 di mart 1933 na Kòrsou, mihó konosí komo Benno. E a sa di duna un empuhé musikal na nos Tambú. Ela kuminsá ku esaki for den su año di hubentut den konhunto di San Jose. Sr. Benno a kuminsá kanta tambú na un fiesta na Klup Bin Bo Bula Aden, a pidié pa kanta tambú. E la kanta riba un suseso ku a tuma lugá na e fiesta, aki el a kanta e piesa “E mucha a saka”. Ku e piesa aki e la kue hopi fama. Sr. Benno a disidí di lanta su mes grupo di tambú ku ta Grupo Trankilo. Algun tambú hopi konosí ku sr. Benno a komponé ta: “Piep piep zei de muis”, “Mirna kosedo”, “Kodela”, “Shangala”, “Nan a basha kas abou”, “Orashon”, “Karta pa Mimi” i hopi mas. Pa konkluí, Benno a duna un balor masha grandi na elevashon di nos kultura ku su arte di komponé i kanta tambú. Sin duda e ta un di nos baluartenan riba tereno di tambú. Alabes Benno a kontribuí semper na su manera ku nos komunidat den forma di yudansa na su próhimo, sea via di su kanto i òf su obra síviko ku e tabata hasi ku esnan ku ta tin mester di esaki.

Julio Constantino Hermanus, mihó konosí komo Eligio Melfor a nase dia 12 di aprel 1940 na Kòrsou. Na 1959 aparte di tabata deklamá poesia di fábula ku hopi éksito tur djaweps anochi na Radio Hoyer, sr. Eligio a optené e mesun año ei su diploma di Mulo. Despues di esaki el a sigui su karera na año 1960 na “bedrijfschool” na Shell . Durante di e periodo aki sr. Eligio a kuminsá ku teatro i tabata skirbi fábula imitando zonidonan di instrumentonan i di bestia. Na edat di 20 año sr. Eligio a kuminsá destaká den e área di teatro i a kuminsá presentá su obranan artístiko na Club di Shell. Despues e la sigui pa Roxy i Sentro Pro Arte pa aktualmente na Teater luna Blou i Because Entertainment Centre. E loke ku ta hasi sr. Eligio spesial ta ku e no a studia arte, pero por bisa ku el a haña su estudio na ‘UNIVERSIDAT DI BIDA’. Sr. Eligio tabatin su sentro di grabashon di kasèt “Hari” i tambe fábrika di kasèt “Hari”. E la asta saka disko di fábula i a komponé diferente piesa pa mensioná algun: “Ta ken ta gana Elekshon”, “Ayo mi amor”, “Beberin den polítika”. Na televishon sr. Eligio a produsí vários programa ku éksito manera: “HARI” na 1977, “Humor ku Eligio” na 1991, “Amia Fecunda”. Den área di publisidat sr. Eligio a destaká ku su komersialnan chistoso pero tòg mashá edukativo. E lista di obranan ku sr. Eligio a skirbi ta largu pero mester mensioná unu en partikular ku ta “HULANDA MI TA BAI”. Algun otro obra ta: “Esta un kurashi”, “Ken ta gana elekshon”, “Tinchi kita as”, “Wan tres porta”, “Muhénan wapu”, “Gainan fini”, “Beberin den polítika” i hopi mas. Sr. Eligio Melfor ta un persona ku pa años a laga Kòrsou kompleto hari su fábula, chiste i komedianan. Loke ta hasi esaki interesante ta ku e no tabata pone hende hari so, kada produkshon e tabata trese ku un mensahe pa na final di e komedia pueblo por sigui pensa riba i siña di dje.

Sr. Gladwin de Lanoi a nase dia 4 di novèmber 1944 na Kòrsou. Na año 1980 sr. de Lanoi a kuminsá den natashon dor di hiba su yunan lès di landamentu pa despues inkorporá nan den klup di natashon “Bulado Swimming Club”. Sr. de Lanoi a bira coach asistente di e tòp landadónan di e klup. Despues di esaki sr. de Lanoi a bira wes di natashon, kaminda pa su imparsidat i kurashi demostrá el a keda inkorporá den bont di Karibe i Centro Amerika (CCCAN) komo miembro tékniko te ku 2019. Pa tur su trabounan boluntario duná na e

mundu di natashon el a keda rekonosé na diferente okashon komo wes di aña i instalá den Salòn di Fama di FDOK. Nominá komo miembro Honorabel di klup Buladó i nominá komo miembro Honorabel di CCCAN. Denter den un korto tempu el a subi bira un di nos rèfrinan (wes máksimo). Su promé kompetensia internashonal tabata na aña 1986 den kompetensia di "Caribbean Island Swimming Championships" aki na Kòrsou komo rèfri. Sr. de Lanói a traha den hopi kompetensia komo rèfri i wes di estilo na e.o.: Aruba, Hulanda, Bonaire, Repùblika Dominikana, Puerto Rico, Trinidad & Tobego, Bahamas, Jamaica, Cuba, Venezuela, Colombia, Mexico, Panama, Salvador, Guatemala, Argentina i Perth (Australia). Na 1993 pa 2009 sr. de Lanói tabata rèfri di FINA. Na aña 1995 pa 2003 el a keda apuntá komo miembro tékniko di CCCAN pa natashon. Na aña 2011 pa 2013 el a fungi komo miembro tékniko "TC Openwater". Na 2014 CCCAN a bolbe eligí sr. de Lanói pa un periodo di 5 aña te ku 2019. Riba su propio forsa el a partisipá na 4 kongreso internashonal pa FINA. Sr. de Lanói tabata i te ainda ta instruktor i a coach diferente alumno di Kòrsou, Aruba i Boneiru. El a keda nominá 8 bes pa wes di aña di natashon di kua el a logra sali 4 bes komo wes di aña. Na 2017 sr. de Lanói a keda instalá den Salòn di Fama di FDOK. Banda di natashon e ta hasi trabou boluntario na skol Emanuel i J.F. Kennedy.

Sr. Lionel Jules Janga a nase 12 di aprel 1956 na Kòrsou. For di edat yon i siendo un alumno ehemplar, sr. Lionel tabata yuda su kostudiantenan pa nan ta un mihó persona. Esaki a dun'é e ánimo pa yuda su próhimo sali pa dilanti. E tabata un miembro hopi aktivo den "Leerlingenraad" di su skol sekundario. Sr. Lionel a hasi un kantidat di trabou boluntario na bienestar di Kòrsou i di su pueblo. Na aña 2014 pa 2015 el a fungi komo miembro di: Milieuraad, Stichting NAAM, presidente 2007-2015, Huurcommissie, miembro 2000-2005, Sekretario / Tesorero Fundashon Parke Nashonal 1998-2020, Presidente Fundashon Nos Kos, Sekretario Fundashon Yubi Kirindongo pa mas di 30 aña, Monumentenraad 2018-2020 i Prins Bernhard Cultuurfonds Caribisch Gebied. Ku su nètwerk amplio i diversifiká, ku amplio konosementu riba arte, kultura, historia, medio ambiente i mas, sr. Lionel ta un miembro sumamente balioso. Fuera di esakinan sr. Lionel a ser invitá i a duna vários charla na universidatnan na mundu. Tambe el a duna aporte komo "speaker" na vários konferensia i kongreso. Kaminda ta nesario sr. Lionel ta yuda boluntariamente komo: Konosedó di vários sorto di músika lokal i internashonal, Konosedó di pintura i arte di tres dimenshon (arte plástiko), Konosedó di kultura di Kòrsou, Karibe i mundu. Sr. Lionel tabata miembro di: Stichting Leerstoel voor milieu en ontwikkeling i direktiva di Prins Bernhard Cultuurfonds Caribisch Gebied. Tambe sr. Lionel ta kontrolá "scriptie" di studiantenan gratuitamente. Esaki ta pone e diploma mas na alkansa di hopi alumno ya komo ku e alumnonan na un manera profeshonal sin barera finansiero ta ser evaluá i guiá. Boluntariamente vários estudiante di UoC ta keda guiá ku nan estudio. Na aña 1983 sr. Lionel a drenta servisio di "Eilandgebied Curaçao" na "Dienst Ruimtelijke Ontwikkeling en Volkshuisvesting (DROV)". Na 1990 el a ser nominá komo hefe di "afdeling planvorming en volkshuisvesting". Na aña 2017 el a baha ku penshun.